

Cots e giaglinas da taus e da draussa

Cusseglie governativ Mario Cavigelli en ils gauds dal Grischun central

■ (cp) Il cusseglie governativ Mario Cavigelli, schef dal departament da construcziun, traffic e selvicultura, ed il selvicultur chantunal Reto Hefti han visità dacurt il center regional da l'uffizi da gaud e privels da la natira a Casti. Ultra d'in barat infurmal cun il team sco er davart l'organisaziun da la regiun forestala Grischun central/Moesano han pudì vegnir discutadas en spezial dumondas e tematicas forestalas specificas per la regiun.

En il center da l'excursiun specifica en ils gauds da la vischnanca d'Alvagni n'è per ina giada betg stada la tgira dal gaud da protecziun, mabain la biodiversità

forestala ed il spazi da viver pretensius per ils cots e las giaglinas da taus e da draussa, il pli grond utschels da gaud che vivan en Svizra. Cun questa chaschun han il manader regional *Christian Barandun* sco er sias collavuraturas e ses collavuratur da la regiun forestala Grischun central/Moesano pudì mussar en moda impressiunanta co ch'ils spazis da viver da quests abitants periclitads da noss gauds pon vegnir mantegnids e promovids cun success sch'il gaud vegn tgrirà cun cleras intenziuns.

Ultra da mesiras intenziunadas a favur d'ina tscherta spezia d'animals han plinavant er gauds rars, che vegnan da prefe-

renza pasculads, ina impurtanza generala per la biodiversità. Il manader regional Barandun ha explitgà quai a maun da l'exempel reussì da las pastgiras e da las pastgiras da gaud en il territori da las aclas d'Alvagni. Quellas han survegnì dapli glich ils ultims onns cun mesiras forestalas ed uneschan en moda exemplarica ils interess da l'agricultura, da la selvicultura e da la protecziun da la natira.

La regiun forestala Grischun central/Moesano cun il center regional a Casti e cun il post extern a Roveredo è la pli gronda da las tschintg regiuns forestalas en il chantun Grischun ed occupa indesch collavuraturas e collavuratur.